

# Sanaartornermi neqerooruteqartitsisarneq pillugu Inatsisartut inatsisaat pillugu Namminersorlutik Oqartussat nalunaarutaat

Matumuuna nalunaarutigineqarput Sanaartornermi neqerooruteqartitsisarneq pillugu Inatsisartut inatsisaat nr. 11, 2. december 2009-meersoq, allannguutit makkunani malitsigineqartut ilanngullugit Inatsisartut inatsisaat nr. 4, 15. april 2011-meersoq, Inatsisartut inatsisaat nr. 18, 22. november 2011-meersoq aamma Inatsisartut inatsisaat nr. 15, 26. november 2020-meersoq.

## Kapitali 1

### *Atuuffa*

§ 1. Sanaartugassat suliarineqarnissaannut, imaluunniit sanaartugassat pilersaarutitalerlugit suliarineqarnissaannut neqerooruteqartitsisarnermut, aammalu suliaakkiissutinik tunniussisarnermut inatsit atuuppoq.

*Imm. 2.* Neqerooruteqartitsisartunut ukununnga inatsit atuuppoq:

- 1) Kalaallit Nunaanni Namminersorlutik Oqartussat, ingerlatseqatigiiffit aalajangiisarnermi Kalaallit Nunaanni Namminersorlutik Oqartussat sunniuteqarfignarsaat kiisalu kommunini oqartussaasut ingerlatseqatigiiffiillu, aalajangiisarnermi kommunit sunniuteqarfignarsaat.
- 2) Neqerooruteqartitsisut allat, pisortanit tapiiffigneqarlutik sanaartugassanik neqerooruteqartitsisut, tassungalu qularnaveequsiissutit.

*Imm. 3.* Inatsit imm. 2 apequtaatinnagu ukununnga atuutinngilaq:

- 1) Piginneqatigiilluni inissiat, sanatitsisunit namminersortunit sananeqartut aningaasalersorneqartullu, tamatumalu kingorna piginneqatigiilluni inissiaatillit peqatigiiffiannut tunniunneqartut.
- 2) Namminerisamik inissialiortiternerit, inissianut aningaasalersuisarneq pillugu Inatsisartut inatsisaat naapertorlugu taarsigassarsinissamik neriorsuuteqarfusut.

*Imm. 4.* Sanaartornermi suliaakkiissutissap tunniunneqarnerani inatsit imaluunniit tassani maleruagassat tunngavissatut atuutissasut neqerooruteqartitsisup ersarissumik nalunaarutigisimappagu, neqerooruteqartitsinermi suliaakkiissumillu tunniussinermi suleriaasissamut inatsimmi maleruagassat aammattaaq atuutissapput.

*Imm. 5.* Inatsimmi matumani maleruagassat imm. 4 malillugu atorineqartillugit, kapitali 7-imi maalaaruteqarnissamut maleruagassat tamatigut atorineqarsinnaapput.

### *Nassuiaatit*

§ 2. Sanaartornermi suliaassat tassaapput suliaassat, sanaartorfimmi, illumi imaluunniit illuliami atortoqarfiliamiluunniit, suliat timitaannik aalajangersimasunik naammassisaqarnissamik siunertaqarfiusut.

§ 3. Inatsimmi matumani suliariumannittussarsiuussinertut paasineqassaaq, suliaassap neqeroortitsivigineqarnerani arlalinnut piffissap aalajangersimasup ataatsip iluani, aammalu neqerooruteqartitsineri tunngavissat assigiit, imaluunniit atuuttussamik neqerooruteqarnissamut piumasaqaatit minnerpaaffissaat ataatsimoortut, imaluunniit sanaartugassaq pillugu suleqatigiinnissamik pisussaaffiliisumik neqerooruteqarnissaq tunngavigalugit neqerooruteqartitsinertut.

*Imm. 2.* Tamanut ammasumik suliariumannittussarsiuussinermi tusagassiuutitigut naqitatigut imaluunniit elektronik atorlugu tusagassiuutitigut allagarsiinikkut kikkunnulluunniit neqerooruteqarnissamut kajumissaarisoqassaaq.

*Imm. 3.* Killilimmik suliariumannittussarsiuussinermi toqqaannartumik, imaluunniit neqeroortikkusutat kisiisa saaffigalugit neqerooruteqarnissamut kajumissaarisoqassaaq.

§ 4. Piukkunnartussarsiorneq paasineqassaaq tassaasoq, neqerooruteqartitsisup toqqaanissamut tunngavissat ataatsimoortut tunngavigalugit neqerooruteqartussatut kissaatigineqartunik toqqaanera.

§ 5. Sinaakkutissatut isumaqatigiissutitut paasineqassaaq, assersuutigalugu piffissaliussap iluani sanaartugassat assinginut sananeqarsinnaasunut akit, pitsaassutsit amerlassutsillu, imaluunniit annertussutsit eqqarsaatigalugit piumasaqaatinik isumaqatigiissusiorfiusutut.

§ 6. Neqeroorutit suliariumannittussarsiuussinikkut imaluunniit sinaakkutissatut isumaqatigiissusiornikkut pissarsiarineqarsimanngitsut tassaapput suliaqartinniakkat ilisimatereerlugit neqerooruteqartitsinerit.

## Kapitali 2

### *Neqerooruteqartitsineri pissutsit tunngaviusut*

#### *Unammilleqatigiinneq assigiimmillu pineqarnissaq*

§ 7. Sanaartugassanik inatsimmi matumani ilaatinneqartunik suliaqarnissamut, imaluunniit pilersaarusiornissamut suliaqarnissamullu neqeroorutit tamanut ammasumik suliariumannittussarsiuussinikkut, imaluunniit killilimmik suliariumannittussarsiuussinikkut, suliaqartinniakkalluunniit ilisimateerlugit neqerooruteqartitsinikkut pissarsiarineqassapput.

*Imm. 2.* Neqerooruteqartitsisup naammaginantumik unammillersinnaalernissamut periarfissat atorluassavai.

*Imm. 3.* Neqerooruteqartitsisoq neqerooruteqartitsinissamik piareersaanermi ingerlatsinermilu, aammalu suliaqatigiinnissamik tunniussinermi pisussaavoq, neqerooruteqartumik toqqaanermi kinaassusersiunngitsumik, piviusorsiorlumik immikkoortitsiviunngitsumillu tunngaveqarnissaq, aammalu neqerooruteqartut akornanni assigiinngisitsisoqannginnissaa isumagissallugu.

*Imm. 4.* Neqerooruteqartitsineq atorineqarsinnaaffisigut "Kalaallit Nunaanni sanaartornermi suliaassanut

pilersuinerimullu piumasaqaatit ataatsimoortut (AP)” imaluunniit allagartat allat pisortanit akuerisat naapertorlugit ingerlanneqassaaq.

*Imm. 5.* Neqerooruteqartitsineq AP malillugu ingerlanneqarpat, tak. imm. 4, AP-mik saneqqutsinissaq taamaallaat tunngavissat immikkut ittut pineqartillugit pisinnaavoq. Saneqqutsinissamut aalajangersakkat pisuni ataasiakkaani neqerooruteqartitsinermut najoqqutassiani erseqqissarneqartassapput.

#### *Suliassat suliarinerini akiligassiisutaasartut*

**§ 8.** Sanaartornermi suliassat suliarinerini akiligassiisutaasartut tamanut ammasumik neqerooruteqartitsisarnermut maleruagassanut ilaatinneqanngillat. Sanaartornermi suliassanut suliarinerini akiligassiisarneq pissutsit immikkut ittut pissutaallutik pisariaqartitsiviusuni, imaluunniit sanaartugassaq annerpaamik 500.000 koruuninik naleqartussaattillugu taamaallaat qaqutiguinnaq atorneqarsinnaavoq.

*Imm. 2.* Imm. 1 naapertorlugu pissutsit immikkut ittutut isigineqartut assersuutigalugu tassaapput nutarterinerit, iluarsaassinerit allanngortiterinerillu annertussutsimikkut, pitsaassutsimikkut piffissamillu atuiffiusussamik siumoortumik aalajangiiffigissallugit annertuumik ajornakusoortinneqartut.

#### *Neqerooruteqarnissamut uppersaanissamullu piffissarititaasut*

**§ 9.** Neqeroorutip tiguneqarsimanissaanut piffissarititaasoq neqerooruteqartitsinermi najoqqutassani allassimassaaq. Neqerooruteqartussaq neqerooruteqarnissamut naammaginartumik piffissaqarsinnaasunngorlugu piffissarititaasoq sivisussusilerneqassaaq.

*Imm. 2.* Neqerooruteqartoq neqerooruteqartitsinermut najoqqutassani allamik allassimasoqanngippat, neqeroorutip tiginissaanut piffissarititaasup qaangiunnerani ulluni suliffiusuni 20-ni neqeroorumminik atuutsitsinissamut pisussaaffeqarpoq.

*Imm. 3.* § 18 naapertorlugu suliariumannittussarsiuussinermi neqerooruteqartunut isumaqatiginninniarnermi, neqerooruteqartoq isumaqatiginninniarnissamut qaaqquneqanngitsoq imaluunniit isumaqatiginninniarnarit ingerlanerini peersinneqartoq, aalajangiinerup neqerooruteqartumut nalunaarutigineqarnerani erngerluni neqeroorumminut qilersorsimajunnaassaaq.

### **Kapitali 3**

#### *Suliariumannittussarsiuussinermi periaaseq*

#### *Neqeroorutip ilusissaa*

**§ 10.** Suliariumannittussarsiuussinermi neqeroorutit allagaassapput. Neqeroorut atortut elektroniskiusut atorlugit tunniunneqarsinnaapput, neqerooruteqartitsisoq siumoortumik taamaattoqannginnissaanik piumasaqarsimanngippat.

*Tamanut ammasumik killilimmillu suliariumannittussarsiuussinissamik piareersaasarneq*

**§ 11.** Tamanut ammasumik suliariumannittussarsiuussinermi neqerooruteqartitsisoq teknikkikkut aningaasaqarnikkullu pisinnaasat, neqerooruteqartup neqeroorummik naammassinnissinnaasutut piukkunneqassaguni pigisassatut uppersarsagassai pillugit paasissutissanik piumasaqarpat, paasissutissat uppersarsaatillu taakku suussanersut neqerooqqusilluni allagarsiuussami allassimassapput. Aammattaaq suliaasaq akikinnermik neqerooruteqartumut, imaluunniit aningaasaqarnikkut iluanaarnarnerpaamik neqerooruteqartumut tunniunneqassanersoq allagarsiuussami allassimassaaq.

**§ 12.** Killilimmik suliariumannittussarsiuussinermi neqerooruteqartitsisoq tusagassiuutit naqitat imaluunniit elektroniskiusut atorlugu tusagassiuutit aqutigalugit neqerooruteqartitsinissamut allagarsiuussamik tamanut ammasumik saqqummiussilluni neqerooruteqarsinnaasunut pilerisaaruteqarnermigut piukkunnartussarsiorsinnaavoq. Neqerooruteqartitsinissamut allagarsiuussami allassimasussaapput

- 1) peqataanissamut soqutiginnilluni nalunaarnissamut piffissaliussaq, sivikinnerpaamik ullunik suliffiusunik 15-inik sivilissuseqartussaq,
- 2) aningaasaqarnikkut teknikkikkullu pisinnaasat pillugit paasissutissat, piukkunnartussarsiornermut ilaanissamut uppersarsarneqartussat suussusissaat kiisalu taakkununga uppersarsaatissanut piumasaqaatit,
- 3) suliaasaq akikinnerusumik akeqartitsilluni imaluunniit aningaasaqarnikkut iluanaarnarnerpaamik neqerooruteqartumut tunniunneqassanersoq, aamma
- 4) neqerooruteqartut neqerooruteqarnissamut kajumissaarneqartussat amerlanerpaamik qassiusanersut.

**§ 13.** Killilimmik suliariumannittussarsiuussinermi entreprenørit aalajangersimasut kisimik pisariaqartinneqartumik pisinnaasaqartillugit imaluunniit suliaq naammassineqarnissaanut pisariaqartinneqartumik immikkut ittumik ilisimasaqartillugit, piukkunnartussarsiuussinertaqanngitsumik ingerlanneqarsinnaapput.

*Imm. 2.* Aammattaaq killilimmik suliariumannittussarsiuussinermi siumoortumik neqerooruteqartitsiviunngitsumik ingerlanneqarsinnaapput, nunap immikkoortuani pissutsit peqqutaallutik entreprenørit najugaqartut kisimik neqerooruteqarsinnaanissaat naatsorsuutigineqartillugu, aammalu killilimmik neqerooruteqartitsinissamut § 25 a, imm. 4 naapertorlugu aggersaasoqarsimatillugu.

*Suliariumannittussarsiuussinermi neqeroorutit ammarneqarnerini najuussinnaatitaaneq*

**§ 14.** Suliariumannittussarsiuussinermi neqeroorutit sumiiffimmi suliariumannittussarsiuussiffiusumi piffissami siumut aalajangeriikkami ammarneqassapput. Neqerooruteqartut neqeroorutit ammarneqarnerini najuunnissamut, aammalu neqeroorutaasa annertussusaannik nalornissutaasimasinnaasunillu paasisaqarnissamut pisinnaatitaapput.

*Tunniussinissamut tunngavissat*

**§ 15.** Neqerooruteqartitsisup suliariumannittussarsiuussinissaq taamaatinngippagu, suliassaq ukuningga tunngaveqarluni tunniunneqassaaq:

1) appasinnerpaamik akeqartitsisumut, imaluunniit

2) tunngavissat assigiinngitsut, soorlu akit, pitsaassuseq, piffissaq sanaffiusussaq, ingerlatsinermut aningaasartuutit, imminut akilersinnaassuseq, teknikkikkut naligititaasoq, avatangiisinut sunniutissat, sanaartugassamut titartakkat atuuffissallu, isumaqatigiisummi pineqartumi allanngorartuusinnaasut eqqarsaatigalugit aningaasaqarnikkut iluanaarnarnerpaamik neqerooruteqartumut.

*Imm. 2.* Tunniussinissamut tunngavissat suut atorneqassanersut neqerooruteqartitsinermi piumasaqaatini allanneqassaaq. Aningaasaqarnikkut iluanaarnarnerpaamik neqerooruteqartumut tunniussinissamut tunngavissani neqerooruteqartup tunngavissatut toqqarneqartut qanoq nalilersussanera sapinngisamik allanneqassaaq. Naliliisoqarsinnaanngippat neqerooruteqartup tunngavissat pingaarnert siulliullugit tulleriiaassavai.

*Imm. 3.* Neqerooruteqartup suliassaq naammaginarlumik pitsaassusilimmik, naapertuuttumik qajannaatsumillu, imaluunniit piffissaq eqqorlugu suliarisinnaanngikkai ilimanaateqarlunnarpat, neqerooruteqartitsisup neqeroorut itigartissinnaavaa.

#### *Neqeroorutini qinigassat allat*

**§ 16.** Neqerooruteqartitsisup neqeroorutini qinigassanik allanik neqerooruteqartut eqqarsaatigisinnaavaat, neqeroorutini qinigassani allani taakkunani neqerooruteqarnissamut piumasaqaatit minnerpaaffissaat naammassineqarsimappata.

*Imm. 2.* Neqerooruteqartitsisup neqeroorutit allanik qinigassartallit tiguneqarsinnaannginnerat neqerooruteqartitsinermut piumasaqaatini allassinnaavaa.

#### *Isumaqatiginninniarnert*

**§ 17.** Suliassap tunniunneqarnissaanut akit minnerpaaffissaat tunngavigneqartussaappat, neqerooruteqartitsisup appasinnerpaamik akeqartitsiniarluni neqerooruteqartoq kisiat isumaqatiginninniarnfigisinnaavaa.

**§ 18.** Suliassap tunniunneqarnissaanut neqeroorutip aningaasaqarnikkut iluanaarnarnerpaanissaa tunngavigneqarpat, neqerooruteqartitsisup neqerooruteqartut, suliariumannittussarsiuussinermi tunngavissatut nalilikkat tulleriiaakkalluunniit tunngavigalugit aningaasaqarnikkut iluanaarnarnerpaamik neqerooruteqartut pingasut ikinnerusulluunniit isumaqatiginninniarnfigisinnaavai, neqerooruteqartitsinermi piumasaqaatini tamanna atortussaannngitsutut nalunaarutigineqarsimannngippat.

*Imm. 2.* Neqerooruteqartitsisup isumaqatiginninniarnissaq toqqarpagu, suleriaaseq suna malinneqassanersaq kingusinnerpaamik neqerooruteqartutut toqqarneqartunut, neqerooruteqartitsisup isumaqatiginninniarnfigissallugit toqqarsimasaanut isumaqatiginninniarnert aallartinneranni nalunaarutigineqassaaq, tamanna neqerooruteqartitsinermut piumasaqaatini allassimannngippat.

*Imm. 3.* Isumaqatiginninniarnert ingerlanneqarnerini neqerooruteqartut tamarmik assigiimmik pineqarnissat neqerooruteqartitsisup qulakkiissavaa. Pingaartumik neqerooruteqartitsisoq

paasissutissanik, neqerooruteqartut ilaasa allanit pitsaanerusumik inissisimalernerinik kinguneqarsinnaasunik tunniussilluni assigiinngisitsissanngilaq. Isumaquatiginninniarnertit nalaanni neqerooruteqartut allat aaqqiissutissatut akigititassatulluunniit neqeroorutai pillugit paasissutissat § 14 naapertorlugu tamanut ammasumik saqqummiunneqareersimappata, neqerooruteqartitsisup taamaallaat paasissutissat taakku neqerooruteqartumut tunniussinnaavai.

*Imm. 4.* Isumaquatiginninniarnertit suliassap annertuumik allanngortinneqarneranik, imaluunniit tunniussinissamut, tassungalu ilanngullugit nalilersuinermit tulleriiaarinissamullu tunngavissat, imm. 1 naapertorlugu isumaquatiginninniarnertissanik toqqaanermi tunngavissatut aalajangersarneqartut allanngortinneqarnerannik kinguneqassanngillat.

## **Kapitali 4**

### *Suliaqartinniakkat ilisimatereerlugit neqerooruteqartitsineq*

**§ 19.** Neqerooruteqartitsisup suliaqartinniakkat pingasut tikillugit ilisimatereerlugit suliassamut ataatsimut neqerooruteqartissinnaavai.

**§ 20.** Neqerooruteqartut, § 1, imm. 2-mut ilaatinneqartut sanaartugassanut siumoortumik neqerooruteqartitsinermik pissarsiniarsinnaanngillat, matumani pineqanngippata:

- 1) sanaartugassat katillugit 1.500.000 koruuninik taakkuluunniit inorlugit nalillit,
- 2) sanaartugassat annertussutsimikkut, pitsaassutsimikkut piffissalluunniit ingerlanissaa eqqarsaatigalugu ajornakusoortorujussuarmik neqerooruteqartitsinissamut tunngavissat aqutugalugit aalajangersarneqarsinnaasut, soorlu misiliilluni suliat, ilisimatusarnerit ineriartortitsinerillu ilaat imaluunniit iluarsartuussinerit, iluarsaassinerit allanngortitsinerillu, suliassalluunniit isumannaallisaaneq eqqarsaatigalugu kinguartinneqarsinnaanngilluinnartut,
- 3) suliariumannittussarsiuussinermi neqeroorummik, tassungalu ilanngullugu aningaasaqarnermit peqqussutilluunniit malillugit naleqquttumik tiguisoqarsimanngippat, imaluunniit aallaqqaammut neqerooruteqartitsinermi piumasaqaatit annertuumik allannguuteqarsimatinnagit siumoortumik neqerooruteqartitsinissaq pillugu allagarsiinermi qinnuteqaatinik tigusaqartoqarsimanngippat,
- 4) nunami pissutsit pissutsilluunniit allat peqqutaallutik suliffeqarfiit aalajangersimasut pingasut tikillugit kisimik sanaartugassanik suliaqarnissamut periarfissaqarpata, aammalu § 25 a, imm. 4 naapertorlugu isumaqatigiiffiusumik neqerooruteqartitsinissamut aggersaasoqarsimappat, imaluunniit
- 5) pissutsit aalajangiisuusussat immikkut ittut allat peqqutaallutik entreprenørinik aalajangersimasumik toqqaasoqartariaqarpata.

**§ 21.** Neqerooruteqartitsisup suliaqartinniakkat ilisimatereerlugit neqerooruteqartitsinermi suliassap tunniunneqarnissanut appasinnerpaamik imaluunniit aningaasaqarnikkut iluanaarnarnerpaamik akeqartitsinissaq tunngavigineqassanersoq nalunaarutigissavaa.

**§ 22.** Neqerooruteqartup suliassaq naammaginartumik pitsaassusilimmik, naapertuuttumik qajannaatsumillu, aammalu piffissaq eqqorlugu suliarsinnaanngikkai ilimanaateqarluinnarpat, neqerooruteqartitsisup neqeroorut itigartissinnaavaa.

## Kapitali 5

### *Isumaqatigiissutit immersugassat*

**§ 23.** Isumaqatigiissutit immersugassat taamaallaat isumaqatigiissuteqartut akornanni pissutsinut toqqaannartumik sunniuteqarsinnaapput. Isumaqatigiissutit immersugassat taamaallaat neqerooruteqartup ataatsip suliffeqarfiullu ataatsip akornanni isumaqatigiissutigineqarsinnaapput. Neqerooruteqartitsisup pisariaqartinneqarpat suliffeqarfik isumaqatigiissusiornissamut atugassamik neqeroorutissaminik ataatsimoortitsinissamik qinnuigisinnaavaa. Tamannali isumaqatigiissusiornermi piumasaaqatit annertuumik allanngortinneqarnerannik kinguneqassanngilaq.

*Imm. 2.* Isumaqatigiissut immersugassaq sivisunerpaamik ukiuni sisamani atuussinnaavoq.

## Kapitali 6

### *Qinnuteqartunut neqerooruteqartunullu nalunaaruteqartarnej*

**§ 24.** Neqerooruteqartitsisup neqerooruteqartut, suliariumannittussarsiuussinermi neqerooruteqarsimasut, imaluunniit suliaqartinniakkat ilisimatereerlugit neqeroortinneqarsimasut suliakkiissutissamik tunniussinissaq eqqarsaatigalugu qanoq aalajangiisoqarsimanera pillugu sapinngisamik pilertornerpaamik nalunaarfigissavai. Suliariumannittussarsiuussinerup taamaatinneqarnerani imaluunniit suliaqartinniakkat ilisimatereerlugit neqerooruteqartitsinermi ilisimatitsineq tamatumunnga tunngavilersuutaasunik imaqassaaq.

*Imm. 2.* killilimmik suliariumannittussarsiuussinermi piukkunnartussarsiuussinertalimmi, neqerooruteqartitsisup qinnuteqartut piukkunnartunut ilaanersut sapinngisamik piaarnerpaamik nalunaarfigissavai. Aamma qinnuteqartoqarneratigut neqerooruteqartitsisup qinnuteqartoq ilaatinneqanngitsoq sooq qinnuteqaatip itigartinneqarsimaneranut tunngavilersuutigisaminik nalunaarfigissavaa.

*Imm. 3.* Neqerooruteqartitsisup qinnuigineqarnermini neqeroorutip itigartinneqarneranut tunngaviusoq neqerooruteqartunut kallarnejartunut § 14, imm. 3 aamma § 22 naapertorlugit nalunaarutigissavaa, tunngavilersuut § 25, imm. 2 naapertorlugu nalunaarutigineqareersimangippat.

**§ 25.** Aningaasaqarnikkut iluanaarnarnerpaamik neqerooruteqarnissaq tunngavigineqarsimappat, aamma imm. 2-4-mi maleruagassat atuutissapput.

*Imm. 2.* § 18 naapertorlugu isumaqatiginninniarnert aallartinneqarnerinut peqatigitillugu, neqerooruteqartitsisup neqerooruteqartut kallarnejartut isumaqatiginninniarnernut qaaqquneqartussaannnginnerannik aalajangiineq tamatumunngalu tunngavilersuutaasoq pillugu nalunaarfigissavai.

*Imm. 3.* § 18 naapertorlugu isumaqatiginninniarnert naammassineranni, neqerooruteqartitsisup neqerooruteqartut, neqerooruteqartup isumaqatiginninniarfissatut piukkussimasani neqeroorummi aalajangiunneqartumi piginnaasat annertuumillu iluaqutissat nalunaarutigissavai.

*Imm. 4.* § 18 naapertorlugu isumaqatiginninniartoqarsimangippat, imaluunniit neqeroorutit suliaqartinniakkat ilisimatereerlugit neqerooruteqartitsinikkut pissarsiarineqarsimappata, neqerooruteqartitsisup qinnuteqartoqarneratigut neqerooruteqartunut, neqerooruteqarnissamut

piumasaqaatinik naammassinissimasunut, neqeroorummi aalajangiunneqartumi piginnaasat annertuumillu iluaqutissat nalunaarutigissavai.

## **Kapitali 6 a**

### *Siumoortumik nalunaaruteqartarnerit*

**§ 25 a.** Neqerooruteqartitsisup siumoortumik nalunaaruteqarnermigut, suliassat imaluunniit suliassat taakku ilaannit ilaasa suut neqerooruteqartitsisup neqerooruteqartitsiviginiarnerai saqqummiussinnaavai. Siumoortumik nalunaarut tusagassiorfitsigut imaluunniit tusagassiorfiit elektroniskiusut aqputigalugit allagarsiinikkut tamanut ammasumik saqqummiunneqassaaq.

*Imm. 2.* Suliassanut ataasiakkaanut siumoortumik nalunaarut suliassaq suliaritinniagaaq pillugu allaaserisamik naatsumik, kiisalu suliassap suliarineqartussap sumiinneranut aammalu piffissamut suliassap aallartiffissaatut naatsorsuutigineqartumut allagarsiinerusinnaasunullu paasissutissanik imaqassaaq.

*Imm. 3.* Siumoortumik nalunaarut taamaallaat suliassanut, ullormit siumoortumik nalunaarutip tamanut ammasumik saqqummiunneqarfianit naatsorsorlugu neqerooruteqartitsisup sivilunerpaamik qaammatit 12-it iluanni neqerooruteqartitsivigitissallugu pilersaarutigisaanut atuutissaaq.

*Imm. 4.* Neqerooruteqartitsisup siumoortumik neqerooruteqartitsinani aamma isumaqatigiiffiusumik neqerooruteqartitsinani suliariumannittussarsiuussisarnissami, neqerooruteqarnissamut soqutiginnittunik aggersaanikkut siumoortumik nalunaaruteqartarnek atorsinnaavaa. Siumoortumik nalunaarut neqerooruteqartitsisup suliassamut aalajangersimasumut neqerooruteqartitsinermik aallarniinnissaa kingusinnerpaamik sapaatit akunnerinik arfineq pingasunik sioqqullugu tamanut ammasumik saqqummiunneqassaaq, taannalu suliassat suut ilaatinneqarnerisut, sumiiffik aammalu isumaqatigiissutit naammassinissaanut piffissaaq, kiisalu soqutiginnittut saaffiginninnissaannut piffissaaq killiliussaaq pillugu paasissutissanik imaqassalluni.

*Imm. 5.* Neqerooruteqartussat, imm. 4 naapertorlugu siumoortumik nalunaaruteqarnissamut piffissaliussap naannginnerani soqutiginninnerminnik saqqummiussisut neqerooruteqarnissamut qinnutigineqarsinnaapput, tamatumali saniatigut tamatumunnga inatsisitigut piumasaqaateqarsinnaanatik.

*Imm. 6.* Imm. 4 naapertorlugu siumoortumik nalunaaruteqarneq pillugu maalaaruteqarnissamut, ullormit siumoortumik nalunaarutip saqqummiunneqarfianit piffissaaq maalaaruteqarfiusussaaq sapaatit akunnerinut sisamanut killilerneqarpoq, Pisortani Pisiniartarnernut Neqerooruteqartitsisarnermut Maalaaruteqartarfik pillugu Inatsisartut inatsisaanni § 5, imm. 1 malillugu.

## **Kapitali 7**

### *Suliariumannittussarsiuussinerit il.il. pillugit maalaarutit*

**§ 26.** Inatsisartut inatsisaat manna, imaluunniit maleruagassat, Inatsisartut inatsisaat manna naapertorlugu aalajangersarneqartut naapertorlugit aalajangiinerit Pisortani Pisiniartarnernut Neqerooruteqartitsisarnermut Maalaaruteqartarfik pillugu Inatsisartut inatsisaanni maleruagassat naapertorlugit maalaarutigineqarsinnaapput.



§§ 27-34. (Atorunnaarsinneqassapput).

## Kapitali 8

### *Aalajangersakkat allat aamma atuutilerfia*

#### *Aalajangersakkat allat*

§ 35. Sanaartukkat § 1, imm. 2-mi pineqartut suliarineqarnerinut atatillugu ilinniartut qanoq amerlatigisut atorfinitsinneqartarnissaannik Naalakkersuisut maleruagassiorsinnaapput.

*Imm. 2.* Neqerooruteqartitsisartut, § 1, imm. 2-mi taaneqartut, neqerooruteqartitsinerminni aningaasaqarnikkut iluanaarnarnerpaanik neqerooruteqarnissamut piumasaqaatinik atuinnissamut isiginiagassaannik Naalakkersuisut maleruagassiorsinnaapput, tak. § 15, imm. 1, nr. 2

#### *Atortuulersinneqarfia il.il.*

§ 36. Inatsit 1. januar 2010-mi atuutilerpoq, piffissamillu tassanngaanniit suliassanut neqerooruteqartitsivigineqartunut atuutilerluni.

*Imm. 2.* Tamatuma peqatigisaanik suliariumannittussarsiuussisarnermut il.il. Inatsisartut inatsisaat nr. 3, 6. april 1992-imeersoq atorunnaarsinneqarpoq.

*Imm. 3.* Illuliassanut sanaartugassanullu neqeroortitsisarneq pillugu Namminersornerullutik Oqartussat nalunaarutaat nr. 15, 5. juli 2007-imeersoq atorunnaarsinneqarpoq.

§ 37. Pituffimmi sakkutooqarfik inatsimmi matumani aalajangersakkanut ilaatinneqanngilaq.

---

Inatsisartut inatsisaat nr. 4, 15. april 2011-imeersoq ("Kalaallit Nunaanni sanaartornermi sulianut pilersuiner Mullu ataatsimut piumasaqaatit" (AP) atornerqarnerisa erseqqissarneqarnera. Neqerooruteqartitsisarnermut Maalaaruteqartarfiup naammagittaalliutini suliaqarnermini katitigaanera. Neqerooruteqartitsisarnermut Maalaaruteqartarfiup aalajangiisinnatitaaffinik annertusititsineq.)<sup>[i]</sup> imatut atortuulersitsinerneq aalajangersagaqarpoq:

## § 2

Inatsisartut inatsisaat manna 1. juni 2011-mi atuutilerpoq.

---

Inatsisartut inatsisaat nr. 18, 22. november 2011-meersoq (Aalajangersakkamut tapiliussaq, sanaartornermi neqerooruteqartitsisarnermi pitsaassuseq tunngavigalugu unammilleqatigiinnermut

maleruagassanik Naalakkersuisut aalajangersaanissaannut piginnaatitsiviusoq)<sup>[ii]</sup> imatut atortuulersitsinermut aalajangersagaqarpoq:

## § 2

Inatsisartut inatsisaat manna 1. januar 2012-imi atuutilerpoq.

---

Inatsisartut inatsisaat nr. 15, 26. november 2020-meersoq (Aningaasanut killigititassanik iluarsineq, atuuffinnik erseqqissaaneq, siumoortumik neqerooruteqartitsinani aamma isumaqatigiiffusumik neqerooruteqartitsinani suliariumannittussarsiuussisarnissamik piumasaqaatit pillugit aalajangersakkat, siumoortumik nalunaaruteqartarnissamik atuutsitsilerneq kiisalu Neqerooruteqartitsisarnermut Maalaaruteqartarfik pillugu aalajangersakkanik atorunnaarsitsineq)<sup>[iii]</sup> imatut atortuulersitsinermut aalajangersagaqarpoq:

## § 2

Inatsisartut inatsisaat manna 1. januar 2021-imi atuutilerpoq.

---

*Ineqarnermut, Attaveqaasersuutinut Naligiissitaanermullu Naalakkersuisoqarfik, ulloq 19. august 2021*

Ruth Lindhardt

/

Embla Kristjánsdóttir

[i] Inatsimmi allannguutit ukuupput § 7, § 27 aamma § 30.

[ii] Inatsimmi allannguutit ukuupput § 35.

[iii] Inatsimmi allannguutit ukuupput § 1, stk. 2, nr. 1 aamma stk. 3, nr. 2, § 8, stk. 1, § 13, stk. 2, § 20, § 25 a, § 26 aamma §§ 27-34 (paasissutissat attuumassuteqartut).

**Namminersorlutik Oqartussat**

Imaneq 4

3900 Nuuk

E-mail: [nsninatsit@nanoq.gl](mailto:nsninatsit@nanoq.gl)

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut